

Omaggio a Sclafani Bagni

di ANTONELLO DI CARLO

L'origini tua è antica
quantu la terra
e Diodoru cantau
di Agatocle a guerra!
'Ncapu nu pizzu di muntagna
fusti edificatu
e di Madonii domini lu passu
e lu gluriusu passatu.
Pi' li strateghi romani
era un postu senza eguali,
picchi di ddà 'ncapu Himera
avianu sarvanguardari!
Era chistu
lu postu ideali
forti, massicciu,
adattu pi' li Reali.
Vintulatu, assulicatu,
autu e strittu,
eri u postu giustu
pi' commerciu e profittu
di Baruni, Conti,
Confraternite e Santi;
ti temevanu puru
pirati e brianti.
La Sicilia fu duminata,
ma tu fusti fortunata,
onorata, rispettata,
poi da Contea... sminnittata.
In tanti feudi ti spartieru,
ma tu caru paiseddu
sii sempri 'dda...
fieru e superbu.
L'infanzia mia
ni tia passaiu
e di 'ddi mumentu
mai mi scurdaiu.
Li strati, i Porti
e lu Casteddu,
l'amici, a scuola
e u cunvinteddu.
Lasuna si chiamava,
unni di carusi si iucava.
E a propositu di iucata
nun mi scordu da Valata.
Di lu Belvederi a la Rantaria,
di lu Casteddu finu a Sagristia,

di la Porta Soprana
a chidda Sottana,
u' 'nn' avia importanza,
picchi pi tutti i picciriddi
tu eri muggi
di na megnieficenza.
Eri nicu e fortunatu
e dai mura fortificatu.
E siddu si scinni a valli,
mi ricordu di li termi,
unni l'acqua sulfurusa
cu abbunanza sula acchiana
ca 'un avi bisognu
mancu di na funtana.
Acqua miraculosa
unica e suprafina
a Sclafani Bagni scurri
di la sira a la matina.
Tu sii ancora ddà,
supra du puntaluni,
un bar, na putia, un furnu,
na farmacia, un parrinu e nu dutturi.
Ma di nicu eru accussì filici,
ca pi mia i to fimmini
erano lì mieghiu
ca lu munnu fici.
Avia tuttu
e nun mi mancava nenti,
Sclafani Bagni
sii sempri 'ntà me menti.
Ogni jornu
ti viu 'ncapu du pizzu,
di luntanu pari
quasi nu marvizzu,
ca supra na petra
è pusatu,
nicu, stancu
e arrancuratu.
Ma ogni vota
ca pigghiu a to' fotografia,
comu s'annichilisci
la vista mia!
E puru si mi ricordi
un vecchiu stancu e affaticatu,
paisi miu, mi lassi sempri,
sempri, sempri... senza ciatu.